

## Je'ej ti tyaatayu'sej a'íjna i San Pablo a'íjci i Filemón

### *Pablo pu jatyojtye' a'íjci i Filemón*

<sup>1</sup> Nyáaj Pablo, i nyaj eetyánami' a'íjna jime' nyaj já'astijre' i Ciríistu' i ti ajta Jesús pué'een, ajta i nye'ihuáara' Timoteo, a'yaa tu muatyojtye' muéetzij Filemón, i paj tajamuán tyí'muarie' tyajta jéehua muaxie've', <sup>2</sup> tyajta a'íjma i maj a'áa jóosi'rii jo'paj ja'chej, tyajta a'íjna tyojtye' i ta'ihuáara' Apia tyajta i Arquipo, i ti ajta a'yan cha'tána'aj éenye'que' á'viicue're' tyati'ij ityáj. <sup>3</sup> Che' a'íjna i Dios i tyaj jajvástara', ajta a'íjna i tavástara' Jesús ti ajta Ciríistu' pué'een, miche' a'íin tyámua' naa tyajamuáacha'iin, majta tyámua' jamuáa'uurej i ja'muaxiéjnyu'caa tzajta'.

### *Filemón pu tyé'tyojtzire' i Dios ajta jéehua jahuoo jimí*

<sup>4</sup> A'náj tina'aj nu tyé'tyojtzire' i Dios nyajta jahuoo muéetzij jime' nyati'ijta mo'támua'ree, <sup>5</sup> ji'nye a'yaa nu tyí'namuaj je'ej paj tyihuá'xie've' pajta jéehua tyá'tzaahuatye' i tavástara' jimí, pajta néijmi'caa xie've' i tyeítysteristyamua'me'en i Dios. <sup>6</sup> A'yaa nu tyá'huoo i Dios jimí ti'ij a'íjna i paj jin tyá'tzaahuatye' muaatáhuire'en pej pij huame'en i tavástara' jimí, pajta néijmi'i jin a'yan huárinij a'íjna jitze ma'can i Ciríistu'.

<sup>7</sup> Jéehua nu nyetyamua've' muéetzij jimi, ji'nye muáaj paj ca'nyíjra'aj huo'ta', pajta tyámua' tyihuo'tyéeeje a'íjma i tyeítysteristyamua'me'en i Dios.

*Pablo pu jahuoo tí'ij jáahuiire'en a'íjci i Onésimo*

<sup>8</sup> A'yaa pu'ij tyij nyajta a'íjna jin antyínyamua'ree nyej nyij tyimuaata'íjtye'en je'ej paj huárinyij a'íjna jitze ma'can i Ciríistu', <sup>9</sup> a'yaa nu tyá'xie've' nyaj a'yan tyimuaatáhuavij, a'íjna jime' i nyaj jéehua muaxie've'. Nyáaj Pablo, i nyaj nyeríj vásti', nyajta eetyánami' a'íjci jime' nyaj ja'tzaahuatye' i Ciríistu' i ti Jesús pué'een, <sup>10</sup> a'yaa nu tyí'muahuavij a'íjci jime' i nyiyóoj Onésimo, i ajta tyá'tzaahuatye', ji'nye nyáaj nu ca'nyíjra'aj jaatá' a'yújna jó'nyaj je'tyánami'. <sup>11</sup> Jájcuaj imuáj, capu tyi'tíj je'ej tyimuaatyáhuui a'íjna i Onésimo, ajta ijíj jéehua pu nyahuui're' nyéetzij, ajta muéetzij. <sup>12</sup> Nu'ríj nyij nyajtáhua'aj jájcuaj jin jaata'ítij muéetzij jimi, a'íi pu a'ín pué'een i nyiyóoj i nyaj jéehua jaxie've'. <sup>13</sup> A'yaa nu nyáaj tyá'xie'va'ca'aj ti yahuatyá'itzeere'en nyajamuan, tí'ij a' jime' naatáhuui're'en, ji'nye nyáaj nu eetyánami' a'íjna jime' i nyaj tyihuá'ixaatye' i tyeítye'e i Ciríistu' jitze ma'can. <sup>14</sup> Ajta canu a'yan tyá'xie've' nyaj a'yan huárinyij nyequee xu muéetzij muaata'ixaatye'en, tí'ij a'yan huárinyij ca'nyéjrij jime' je'ej tiquee muéetzij tyimua'ránajchi. <sup>15</sup> Tyij quee a'íjna jin a'tzúj á'tyeej ti imuáj je'ej huárupij, tí'ij ajimi huatyá'itzeere'en jusén jime', <sup>16</sup> capu che'

a'yájna tí'ij sáij tí ca'nyéjrij jín tyí'huiire', sulu tí'ij a'ihuáara' í paj jéehua jaxie've', jéehua nu nyáaj jaxie've', ajta jéetze' pu muéetzij jimí juxie've', jí'nye tyévíj pu pué'een, ajta a'ihuáara' pué'een í tavástara' jimi.

<sup>17</sup> A'yaa pu'ij, tipua'aj a'yan petyinaaséjri' nyaj a'ihuáara' pué'een a'ájna jitze í tyaj jitzán tyá'tzaahuatye', a'yaa paj tyaataxie've'en a'ájci í Onésimo patí'ij tyinaataxié'vej nyéetzij.

<sup>18</sup> Tipua'aj tyí'táj jín je'ej pua'aj muáaruuj, na'riíj tyí'táj muá'cha'íire', nyéetzij paj naajíjve'en.

<sup>19</sup> Nyáaj Pablo, nyáaj nu nyamuáca' jín tyí'muayu'se'. Nyáaj nu tyí'muanajchitye'en. Nyajta nyáaj canu a'yan tyí'mua'ixaatye' paj muáaj jo'tyéeyu'xaj, jí'nye muáaj paj tyiná'cha'íire' a'ájci jime' tí muáahuiirej pej pij júurij puá'ra'nyij jusén jime'. <sup>20</sup> A'yaa nu nyij nye'ihuáara' tyí'muahuavíij, pej pij a'ájna jín naatáhuiire'en í tavástara' jitze ma'can, pata'aj ca'nyíjra'aj naata'an í nyaxiéjnyu'caa tzajta' a'yájna patí'ij nye'ihuáara' tyí'pué'een í Círíistu' jimi.

<sup>21</sup> A'yaa nu tyí'muayu'se', jí'nye tyámua' nu tyá'mua'reej paj a'yan rinyij, pajta jéetze' a'yan rinyij je'ej nyaj tyí'muahuavíij. <sup>22</sup> Ajtáhua'aj a'yájna, pata'aj séej í chí'ij tyámua' huá'uurej nyej nyij a'áa ja'rá'astij, jí'nye a'yaa nu tye'ejchó've' tí í Dios naata'an, nyej nyij a'áa ja'tanyéj ajimi, jí'nye a'yaa xu mua'aj tyá'huo í Dios jimi.

*I nyúucarij tí jín ja'antypuá'ritye'sij*

<sup>23</sup> A'íi pu ajta yámuatyojtye' i Epafras, i ti nyajamuan ya' eetyánami' a'íjci jime' ti ajta a'yan tyu'méj i Ciríistu' jimi ti ajta Jesús pué'een, <sup>24</sup> a'íi mu majta yajá'muatyojtye' a'íjna i Marcos, ajta i Aristarco, ajta i Demas, ajta i Lucas, i maj nyahuiire' i tyaj jín tyí'muarie'.

<sup>25</sup> Che' a'íjna i tavástara' Jesús ti ajta Ciríistu' pué'een, che' a'íin tyámua' tyajamuáacha'íin.

**I nyúucarij ti jájcua ti a'ijna á'xaj i  
Tavástara' i Jesús ti Ciríistu' pue'een ajta  
Salmos  
Cora, Santa Teresa: I nyúucarij ti jájcua ti a'ijna  
á'xaj i Tavástara' i Jesús ti Ciríistu' pue'een ajta  
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

4f03662f-a4e0-5c7c-a13b-0b7002b5b8f6